

जिमि केमेस्ट्रीया गुरु करुणाकार बैद्य



• केशरमान ताम्राकार


करुणाकार बैद्ययात दकलय् न्हापां च्वमिकथं मखु, छम्ह केमेस्ट्रीया गुरुकथं म्हस्युगु खः। खँ खः वि.सं. २०३२ सालया। त्रिचन्द्र क्याम्पसय् आइ एस्सी ब्वनेगु इवल्य् वय्कःयात केमेस्ट्रीया प्रशिक्षक कथं म्हसील। वय्कलं जिमित केमेस्ट्रीया लाय्बय् स्यना दी। वय्कःयाके स्यनेगु कला थःगु हे पहःया दु। नाइसे च्वंगु सलं छता छता लाय्बया प्रविधि स्यना दी। शिक्षकया मेचय् च्वनाः जक मखु, छम्ह छम्ह विद्यार्थीया टेबलय् वनाः याना च्वंगु दु मदु, लाय्बया डाटा थःगु नोट कापिइ च्वंगु दु मदुगु खँय् तकं मिखा ब्वया दी। गुरुकथं जक म्हस्युम्ह वय्कःयात लिपा म्हसिल वय्कः छम्ह नांजाःम्ह नेपाल भाषा व खँय् भाय्वा च्वमि खः धकाः। च्वमि धकाः म्हसीसानिसे वय्कःलिसे छम्ह विद्यार्थी व शिक्षकया नाता जक मखसे नेपालभाषाया च्वमि व ब्वमिया नाता जुल। उगु इलय् जिगु च्वसा न्ह्यायेधुंकल - बाखं विधाय्। वय्कलं जिगु बाखं पत्रपत्रिकाय् पिदंगु ब्वने धुंकूगु जुयाच्चन। वय्कःया फुर्सद दइगु वा क्लास मदइगु इलय् वय्कःया कोथाय् (अफिसय्) वना खँ ल्हायेगु, अप्वः धयार्थे भाषा साहित्यया खँ जुइ। वय्कःया लोकबाखं, अनुसन्धानया



विषयलय् खँ जुइ। गवलें गवलें घण्टौ घण्टा नं खँ जुइ।

वय्कलं यक्व हे लोक बाखं मुना दिल। सफू पिथना दिल। अप्वः धयार्थे वय्कःया प्रकाशित सफूत नेपाःया लोक बाखं मुनात खः। बाखं मुनेगु इवल्य् वय्कलं यक्वः हे दुःख सिया दीगु खँ जिमिगु खँल्हाबल्हाय् कनादी। लोक बाखंयात लोप जुइगु पाखें वय्कलं ज्वः मदुगु गुगु कुतः याना दीगु खः, उकियात नेपालभाषा ख्यलय् स्वथना दीगु दु। छगू कथं धायेगु खःसा वय्कःयात नेपालय् च्वपिन्सं जक मखु, हलिमय् च्वपिं मनूतसें नं म्हसीका च्वंगु दु। नेपाःया लोक साहित्य, लोक बाखं अध्ययन

याइपिं विश्वया थी थी विश्वविद्यालय, कलेजया विद्यार्थीनिसें वय्कःया सफू अध्ययन मयासें मगाः। देश विदेशया नां जाःगु लाइब्रेरीइ वय्कःया सफूत मुंकातःगु दु। उकिस वय्कःया सफूत अंग्रेजी भासं नं अनुवाद जुयाः पिकाये धुंकूगुलिं विश्वय् ब्यापक जुइ धुंकूगु दु। अथे हे लोकह्वाःगु अनलाइन पसः Amazon य् वय्कःया 'Nepalese Folk Stories and legends' नांया सफूया मू \$ 95.95 तया मिया तःगु दु। थ्व धयागु भनीगु थ्यं मथ्यं भिद्व तका तू वइ। थुगु हे सफू



जिमि कायया कयतापुजाबल्य सन् २००७ स नेपालय वनाबल्य प्रोफेसर भाजु निर्मल मान तुलाधर अंग्रेजी भाय्या देछागु लुमसे वः । थुगु सफू जिमि काय नं पूर्वक ब्वन । ब्वंगु जक मखसे उगु सफुतिइ दुगु बाखंया समिक्षा नं यात । थौकन्हय व सफू जिमि काय नं कलेजय रंकातःगु दु । थः पासापिन्त ब्वंकेत न्येय बिया च्वंगुदु । मेगुकथं धायेगु खःसा जिमि काय करुणाकर बैद्यया बाखनय दुवी धुंकूगु दु । नेपाःया लोकबाखं थःम्ह ब्वनाः मेपिन्त नं कनेगु याना च्वंगु दु, अमेरिकन पासापिन्त ।

करुणाकरया सरया मेगु छगू न्हयमथसें मगाःगु वय्कःया मातृभाषा प्रतिया ममता व सम्मान खः । वय्कःया लेखन भाषा थःगु मांभाय नेपालभाषा जक मखसे अंग्रेजी व खस नेपाली भाषा नं खः । वय्कलं खस नेपाली भाषां हे सफू च्वयाः निक्कः तक्क नेपाःया प्रतिष्ठित 'मदन पुरस्कार' त्याके धुंकूगु दु । वय्कःया मातृभाषा प्रतिया अनुराग थुकथं नं क्यनी कि वय्कलं च्वयादीगु दकले न्हापालंगु सफू नेवाः भासया माध्यमं खँय भाय हिन्दी भाय व अंग्रेजी भासं खँल्हाबल्हा यायेत अपुकीगु सफू 'नेपालभाषा - नेपाली

शिक्षा खः । नेपालभाषाया माध्यमं मेमेगु भाय सयेकेगु । वय्कःया निगु भाय स्यनीगु सफू *Nepalese Self Taught* व *Teach yourself Nepali* खः ।

थ्व निगुलिं सफू नांजागु अनलाइन सफू पसः Amozan. com व Abe books.comय मीयातःगु दु । न्हापा स्वयातयेधुकंगु सफूत मीगु थुगु अनलाइनय थी थी देशय च्वपिं मनूतयसं उगु सफू मीत विज्ञापन यानातःगु खः । थुकि मध्ये सन् १९५६य पिथनातःगु *Nepalese Self Taught* या मू \$ 62.88 तया मिया तःगु दु ।

करुणाकर सरया मेमेगु अंग्रेजी भाषा पिथनातःगु लोकबाखंत नं थन मीयातःगु दु । थुकथं लोकबाखं व भाषायात अन्तरराष्ट्रिय ख्यलय प्रचार प्रसार यायेत वय्कः सरया तःधंगु योगदान दु । तर नेपाः दुने उजोम्ह ब्यक्तित्वयात म्हसीके मफूगु व वय्कःया योगदानयात कदर याये मफूगु, थुइके मफूगु धयागु भीगु हे कमी कमजोरी खः । थज्यागु खँय नं भी सकसिनं ध्यान बियाः थःपिनिगु कला सम्पदाया संरक्षणय योगदान बियावःपिं सकल अग्रजतयगु सम्मान यायेगु खँय भी सकले सचेत जुइमाःगु तायेका ।



बाइलि

साहित्यिक लय्पौ